

ШАРТЛИ ИФОДА ВА ОБРАЗ ЯРАТИШ УСУЛЛАРИ.**Моҳира Исломова**

ФарДУ Таянч доктарант

Аннотатсия: Мақолада мажоз аллегория шартли ифода усулларидан фойдаланиш ҳақида гап боради. Шунингдек фолклор ҳамда ёзма адабиётда қүш образини мажозий қўллаш орқали ҳаётий, тасаввифий маъноларни ифодалашга йўналтирилади.

Калит сўзлар: Шартли ифода, образ яратиш, усул, восита, аллегория, мажоз, ғоявий мақсад, бадиият.

Бадиий адабиётда мажозий образ ёки рамзий ифода асарнинг бадиий-эстетик қимматини, таъсир кучини оширишга хизмат қиласиган воситалардан биридир. Мажоз-- адабий бадиий усул ёки образлилик тури: мавхум тушунча ёки мулоҳазаларни аниқ бир образ воситасида ифода этиш. Мажозда икки ҳил тушунча орасидаги яқинликка асосланиб, янги шартли ифода яратилади. Маънавий қадриятлар(ҳақиқат, муҳаббат, виждон, иймон каби)ни умумий тушунчалар билан бирга маълум типик ҳодисалар, характерлар, мифалогик персонажлар, хатто аниқ шахслар бўлиб, маъноли томон бирламчи, образлиси иккиламчидир.

Кундалик мулоқот ва муомалада, сўз санъати намуналарида шартли ифоданинг икки ҳил кўринишини кузатишимиш мумкин. Баъзан қушга хос хатти-харакат ва характер хусусиятлари инсонга кўчирилади. Масалан:

Қайга борсанг ғоз юрарсан бошда дўппи

гердайиб...(Эркин Воҳидов)

Шоир мазкур мисрада миллий ифтихор рамзи бўлган бош кийимини кийган холда ғурур билан юрадиган юртдошларини образини қушга хос белги ва хусусиятлар орқали гавдалантироқда.

Қарға юриш қиласман деб, чумчуқнинг чатаноги йиртилибти.(Матал)

Сўзловчи бундай мажозий ўхшатишлар орқали кимгадир тақлид қилиб, қўлидан келмайдиган ишга уринадиган кимсаларни қушларнинг хатти-харакати орқали гавдалантириб, тингловчи мақсадини образли етказиш, лўнда ва қатъий хукм чиқаришга харакат қиласади.

Яна: Бир чўкиб икки аланглайди.

Бу ўринда хар бир нарса-ходисага хадиксираб қарайдиган, журъатсиз ва ховотирда юрадиган кишиларга нисбатан қушга хос хуркаклик хусусияти шартли ифодалар орқали кўчирилмоқда.

Айрим ҳолларда шартли ифоданинг иккинчи кўринишига ҳам дуч келамиз. Бундай ифода одамларга хос характер, хатти-харакат ва кўринишлар қушларга кўчирилади. Масалан: Мақтанма ғоз, хунаринг оз (Халқ мақоли). Бу ўринда бирор қасб-хунарни чала-чулпа ўзлаштирган, бирор юмушни мукаммал охирига етказа олмайдиган, аммо ўзини ўша соҳанинг билимдони ва устаси қилиб кўрсатишга уринадиган кимсалар назарда тутилади. Мақол аслида Шарқда машҳур бўлган сувда балиқдек суза олмайдиган, парвозда лочинга тенглаша олмайдиган, ерда кийикдек югурга олмайдиган, лекин сузишга, ерда юришга, кўкда уча олишга қодир бўлган ғоз хақидаги хикоятнинг хуносаси бўлгани учун ҳам ўкувчи ёки тингловчи онги-шуурига дархол етиб боради ва бадиий-эстетик таъсирини таъминлайди. Ёки “Осмон тушиб кетса тутиб қоламан деб, синчалак оёфини осмонга қилиб ётар экан” (Абдулла Қаҳҳор) сингари образли ифодада ҳам инсонга хос қалтабинлик ва ўзига бино қўйиш хусусияти қушга кўчирилмоқда. Бундай шартли ифодалар оғзаки адабиётда кўплаб учрайди ва ёзма адабиётга ҳам ўзининг самарали таъсирини кўрсатиб келмоқда.

Шарқ фольклори ва ёзма адабиёти намуналарида мажознинг турли шакллари кўплаб учрайди. Айниқса, Жалолиддин Румий, Фаридиддин Аттор, Абдураҳмон Жомий, Алишер Навоий, Бедил сингари сиймолар ижодида шартли, мажозий ва рамзий образлар мавжуд бўлиб уларнинг кенг миқёсли мазмуни баъзан реал-ҳаётий образга сифмайди. Шунинг учун ҳам кўпмаънолиликка, фалсафий теранликка, умумбашарий ғоялар ва масалаларга бойлик ҳамда бадиий юксакликка кўплаб машҳур асарларда ана шундай мажозий образлар воситасида эришилган. Шарқнинг машҳур шоирларидан бири бўлган Умар Хайём рубоийларидан бирида шундай дейди:

Бизлар қўғирчоқмиз, фалак – қурчоқбоз,

*Бу сўзим чин сўздир, эмасдир **мажоз**.*

Йўқлик сандигига кетамиз бир-бир –

Вужуд палосида ўйнагач бир оз!

(Форсчадан Ш. Шомуҳамедов таржимаси).

Шоир бу ўринда Шарқ шеъриятида ижтимоий-ҳаётий муаммоларнинг аксарияти мажоз воситасида ифодаланишига ишора қиласар экан, иккинчи томондан, мажозий ифодада ҳам ҳаётий ҳақиқат ёрқин кўзга ташланиб туришини баён этмоқда.

Форс-тоҷик адабиётининг атоқли намояндаларидан бири, мутафаккир шайх Фаридиддин Аттор (тахминан 1141-1229) ўз ижодий фаолияти билан Яқин ва Ўрта Шарқ ҳалқлари адабиёти тарихида муҳим ўринлардан бирини эгаллайди. Шоирнинг кўпсонли асарлари орасида “Мантиқ-ут тайр” достони алоҳида аҳамиятга эгадир. Мазкур достонда муаллиф тасаввуф таълимотининг асосий қонун-қоидаларини мажозлар воситасида изчил баён этади.

Достонда Булбул, Товус, Тўти, Тазарв, Кабк (каклик), Бум (Бойқуш), Уқоб (Бургут), Бат (Ўрдак) ва бошқа қушларнинг образлари мавжуд. Шоир мазкур образларни жамиятда тутган ўрни, машғулоти ва харкети жиҳатидан бир-биридан ажралиб турувчи муайян шахс типларининг мажозий образи сифатида талқин этади. Бу соҳада у, асосан, ўз даври ҳалқ оғзаки ижоди, ёзма адабиёт ва тасаввуф шеъриятида тўпланган бой тажрибаларга сунади. Масалан, Уқоб образи фолклор ва бадиий адабиётда бўлгани каби мағрурлик тимсоли, Товус эса ўз ташқи гўзаллигини кўз-кўз қилиб, мағрурланиб юрувчи усти ялтироқ, ичи қалтироқ кишиларнинг мажозий-аллегорик образидир. Қушлар образини шу хилда ижтимоий ҳаётга яқинлаштириш шоир учун тасаввуфга доир энг муҳим назарий масалаларни кенг баён этишга имкон берган.

Шоирнинг мазкур мавзуни ривожантиришга қўшган муҳим ҳиссаларидан бири унинг асаридан Ҳудҳуд (попишак) образининг ўрин олишидир. Чунки Аттор асарида Ҳудҳуд бош, етакчи қаҳрамонлардан бири бўлиб, достондаги барча воқеа-ҳодисалар бевосита унинг фаолияти билан узвий боғлиқ ҳолда берилган. Атторгача бўлган шу типдаги асарларда бу образни учратмаймиз.

Аттор Ҳудҳуд образини асосий мавзуу доирасига олиб кирад экан, биринчи галда у ҳақдаги Шарқ фолклори ва Куръонда мавжуд айрим маълумотларга таянади. Ривоятларга кўра, Ҳудҳуд Сулаймон пайғамбарнинг энг яқин сирдоши ва яқин маслаҳатчиси бўлиб, у билан Сабо шахри маликаси Билқис ўртасидаги севги муносабатларида воситачилик ролини ўтаган ва бу борадаги алоҳида хизматлари учун пайғамбар назарига тушган. Бошқа ривоятларда ҳам Ҳудҳуд ана шу тарзда донишманд ва махфий сирлардан хабардор қуш сифатида талқин этилади. Шоир мазкур ривоятлардан ижодий фойдаланиб, Ҳудҳудни Симурғ томон сафарга чиқкан қушларнинг йўлбошчиси сифатида тасвирлайди. Ҳудҳуд образига юкланган бу вазифа уни тариқат йўлига кирган сўфийлар раҳнамоси (пири муршид)нинг умумлашма мажозий образи даражасига кўтаради. Шунга мувофиқ, асарда тасаввуфга оид барча назарий ва амалий масалалар унинг тилидан баён этилади.

Аттор афсонавий Анқо қуши ўрнига форс-тоҷик ҳалқлари орасида машхур бўлган Симурғ қушини асарга олиб киради ва шу орқали унга жуда катта ғоявий-бадиий вазифа юклайди. Достонда ҳикоя қилинишича, йетти водийдан (Талаб, Ишқ, Маърифат, Истиғно, Тавҳид, Ҳайрат ва Фақру фано водийлари) учиб ўтиш жараёнида Симурғни излаб йўлга чиқкан қушларнинг деярли барчаси ҳалок бўлиб, атиги ўттизтаси кўзланган манзилга йетиб келади. Ана шу ўттизта қуш (си мурғ) Симурғ (худо) га айланади, ўзларида Симурғнинг белги-фазилатларини кўради.

Достоннинг юзага келиши Шарқ ҳалқлари адабиётида катта воқеа бўлди. Асар мажозий тасвир усули орқали тасаввуфий-фалсафий масалаларни ифода этишининг эпик поэзиядаги мумтоз намуналаридан бири сифатида шухрат қозонди. Ўзидан кейинги форс-тоҷик ва туркий ҳалқлар адабиётининг фалсафий-дидактик йўналиши тараққиётига кучли таъсир кўрсатиб, Шарқ шеъриятида янги бир анъанани – қуш тили билан асарлар яратиш анъанасини бошлаб берди.

АДАБИЁТЛАР:

1. Алишер Навоий. Лисон-ут тайр. Тошкент. 1989
2. Аристотел. Поэтика. Тошкент. 1980
3. Султон И. Адабиёт назарияси. Тошкент, 1980.
4. Сайфиддин Рафиддин. Мажоз ва ҳақиқат. Т.: 1998
5. Куронов Д. ва б. Адабиётшунослик луғати. Тошкент. 2010